

Ubah wajah Kuala Pahang

UMP laksana
Projek Facelift D'
Kuala sebagai
langkah ke arah
pembangunan,
pendidikan
pelancongan

DIANA SURYA ABD WAHAB

PEKAN - Projek Facelift D' Kuala merupakan inisiatif **Universiti Malaysia Pahang (UMP)** dalam mengubah wajah dan identiti Kuala Pahang yang dikenali sebagai perkampungan nelayan ke arah pembangunan dan pendidikan

pelancongan.

Naib Canselor UMP, Prof Datuk Dr Daing Nasir Ibrahim berkata, UMP telah mengenal pasti 50 rumah penduduk di sekitar kawasan Kuala Pahang bagi menyertai projek tersebut.

Jelasnya, pihaknya telah melaksanakan kerja-kerja mengecat rumah, pembersihan, baik pulih dan pemasangan solar bagi memberi keselesaan kepada penduduk.

"UMP memperkenalkan projek berkenaan sebagai usaha mengubah wajah dan identiti Kuala Pahang sebagai perkampungan nelayan yang menyokong inisiatif pendidikan pelancongan dan Strategi Lautan Biru Kebangsaan (NBOS) dengan menyasarkan lokasi tersebut sebagai salah satu destinasi tempunan.

"Hasrat menjadikan Kuala Pahang pilihan pelancong dalam dan luar negara adalah untuk meningkatkan ekonomi masyarakat sekitar sekali gus mengubah landskap dan sosial penduduk.

"Malah, tumpuan turut diberikan



Warga UMP melawat ke berapakah rumah yang sudah dikenalpasti bagi menyertai projek facelift D' Kuala yang bakal mengubah wajah dan taraf ekonomi penduduk Kuala Pahang.

dalam mentransformasikan minda dengan menekankan aspek pembangunan isi rumah bagi membangunkan ekonomi keluarga dengan projek kebun sayur fertigasi, program peningkatan akademik anak-anak, kemahiran hidup dan menanam sikap pentingkan kebersihan," katanya.

Beliau berkata demikian kepada pemberita dalam satu lawatan di program Ziarah Facelift di Kuala Pahang, di sini.

Dalam pada itu, Daing berkata UMP memilih perkampungan nelayan Kuala Pahang itu berikutan terletak berhampiran kampus sekali gus melaksanakan proses transformasi menerusi projek pembangunan fizikal dan projek infrastruktur bagi pembinaan Kompleks Medan Ikan Bakar yang diselia oleh pensyarah dari Fakulti

Kejuruteraan Awam dan Sumber Alam.

"Projek ini merupakan kesinambungan daripada kejayaan pelaksanaan program Empower Mahkota dilaksanakan oleh Majlis Pembangunan Wilayah Ekonomi Pantai Timur (ECERDC) dengan kerjasama UMP Advanced Education dan Persatuan Wanita UMP atau Matahari sejak 2011.

"Ia melatih dan melahirkan usahawan dalam kalangan peserta isi rumah berpendapatan rendah (B40) iaitu masyarakat sekitar Pekan dan Kuantan," katanya.

Katanya lagi, UMP akan terus mendekati masyarakat setempat dan memberi sumbangan sewajarnya kepada golongan yang memerlukan melalui kelebihan akademik dimiliki.